

خطِ پولسِ بَلَدِه ايمانداراي اِفْسُس

پيشگفتار

مقصدِ امزی خطِ ای آسته که ساحه دیدِ ایماندارا شارِ اِفْسُس دَ باره نقشه اَزلی و اَبدی خُدا و دَ باره فیضِ خُدا وَسعت پیدا کُنه تا اونا هَدَف های نیکِ خُدا ره که بَلَدِه جماعتِ ایماندارا آسته پی بُره.

پولس دَ امزی خطِ بیان مونه که قَصِدِ خُدا اینی آسته که تمام چیزا ره از آسمو و زمی زیر فرمانِ مسیح بیره. اُو امی مطلب ره دَ سه فصلِ اوّل خطِ بطورِ واضح تشریح مَوکُنه. پولس نشو میدیه که نقشه خُدا ای آسته که یهود و غیرِ یهود دَ میراثِ خُدا و دَ جماعتِ مسیح که «جِسْمِ مسیح» گفته موشه، شریک بشه. بعد ازو دَ سه فصلِ دیگه از ایماندارای مسیح خواهش مونه که بطوری زندگی کُنه که لیاقتِ میراثِ خُدا و جِسْمِ مسیح ره داشته بشه.

پولس بَلَدِه نشو دَدونِ اِتْحادِ یهود و غیرِ یهود دَ جِسْمِ مسیح مَثَل های کلو میره: اُو جماعتِ ایماندارا ره «جِسْم» مَوکیه و مسیح ره «سِرِ جِسْم»، جماعتِ ایماندارا ره «ساختمان» مَوکیه و مسیح ره «سنگِ اصلی ساختمان». دَ یگ جای دیگه پولس

دَ بَارِه رَابِطَه خَانَوَارَا مِثَال اُورْدَه جَمَاعَتِ اِيْمَانْدَارَا رِه مِثَلِ «خَاتُو» و مَسِيح رِه مِثَلِ
«شُوِي» بِيَان مُونِه. پُوْلَس قَد فِكْرِ غَوْجِ فَيِضِ خُدا رِه كِه دَ مَسِيح اَسْتِه تَشْرِيح
مُونِه و دَلِيْل هَاِي مَحْكَم و قَاطِع مِيْرِه. دَ حَقِيْقَتِ تَمَامِ دَلِيْل هَا كِه دَ بَارِه مُحَبَّتِ،
فِدَاكَارِي، بَخْشِشِ، فَيِضِ و قُدُوسِيَّتِ مَسِيحِ بِيَان مُوشِه، يِگِ حِسِ خَاصِ دَرِه.

فَهْرَسْتِ عِنْوَانِهَا

دُعا و سلام (۱:۱)

بَرَكَتِ هَاِي رُوْحَانِي دَ مَسِيحِ (۳:۱)

شُكْرْكَزَارِي و دُعا (۱۵:۱)

زِنْدِه شُدُو قَد مَسِيحِ (۱:۲)

يِگْجَايِ بُوْدُو قَد مَسِيحِ (۱۱:۲)

پُوْلَس، رَسُوْلِ بَلْدِه مَرْدُمَايِ غَيْرِ يَهُودِ (۱:۳)

دُعا بَلْدِه اِفِسِسِيَا (۱۴:۳)

اِتْفَاقِ دَ جِسْمِ مَسِيحِ (۱:۴)

زِنْدَگِي كَدُو رَقْمِ بِچْكِچَايِ نُورِ (۱۷:۴)

زِنْدَگِي كَدُو دَ نُورِ (۱:۵)

رَابِطَه خَاتُو و شُوِي (۲۱:۵)

رَابِطَه آتِه-و-آبِه قَد بِچْكِچَا (۱:۶)

دَ بَارِه غُلَامَا و بَادَارَا (۵:۶)

سَلَاحِ بَلْدِه جَنَگِ رُوْحَانِي (۱۰:۶)

سلام های آخری (۶:۲۱)

۱ از طرف پولس که د خاست-و-اراده خُدا رَسولِ مَسِيحِ عيسی آسته، بلده مُقَدَّسینِ شارِ اِنْسِ که د مَسِيحِ عيسی وفادار آسته: ۲ فَيُضِ و سلامتی از طرف آته مو خُدا و مولا عيسی مَسِيحِ نَصیب شمو شنه.

برکت های روحانی د مَسِيحِ

۳ حمد-و-ثنا د خُدا و آته مولاى مو عيسی مَسِيحِ که مو ره د وسيله مَسِيحِ قد تمام برکت های روحانی که د عالم باله آسته، برکت دد. ۴ چُون اُو پيش از بُنيادِ دُنیا مو ره بلده مَسِيحِ اِنْتِخاب کد تا مو د حُضُورِ شى مُقَدَّس و بے عيب بشی. از روى مُحَبَّتِ ۵ اُو مو ره مُطابِقِ خاست-و-اراده نیک خُو تعيين کد تا د وسيله عيسی مَسِيحِ بچکيچای فرزندى شى شنى ۶ بلده ستایشِ فَيُضِ پُر جلالِ شى که مُفْت-و-رایگان د وسيله باچه دوست دشتنى خُو دَز مو بخشيد. ۷ مو د وسيله رابطه قد مَسِيحِ، د وسيله خُونِ اَزُو باخرید شدى و بخششِ گناه های مو د مُطابِقِ فَيُضِ بے اندازه خُدا مُهیا شُد ۸ که پريمو دَز مو بخشيد. اُو قد تمام حکمت و دانایی ۹ رازِ خاست-و-اراده خُو ره بلده ازمو معلومدار کد، مُطابِقِ رضایتِ خُو که د وسيله مَسِيحِ قَصْدِ کُدد. ۱۰ اُو ای کار ره بلده تنظيمِ تکميلِ شُدونِ زمان ها کد تا تمام چیزا ره د مَسِيحِ جَم کنه، ام چیزای ره که د آسمو آسته و ام چیزای ره که د زمی یه. ۱۱ مو ام د وسيله مَسِيحِ صاحبِ ميراثِ شُد، چراکه مُطابِقِ قَصْدِ خُدا مو پيش از پيش تعيين شُدو بُودى، مُطابِقِ قَصْدِ امزو که تمام چیزا ره مُطابِقِ فَيَصَلَه-و-خاست خُو انجام ميديه ۱۲ تا مو اولين کسای که د مَسِيحِ اُميد کدى، باعثِ ستایشِ بزرگی-و-جلالِ اَزُو بشی. ۱۳ شمو ام د مَسِيحِ، وختیکه کلامِ حَقِيقَتِ يعنى خوشخبری نجاتِ خُو ره شنيديد و دَزُو ایمان اُورديد، قد روحِ اَلْقُدْسِ وعده شُدو مَهرِ شُديد ۱۴ که ای بیعانه ميراثِ مو آسته تا وختِ باخریدِ کسای که مالِ خُدا یه بلده ستایشِ بزرگی-و-جلالِ اَزُو.

شکرگزاری و دُعا

۱۵ د امزی دليل، ما از وختیکه د باره ایمان شمو د مولا عيسی و مُحَبَّتِ شمو قد تمام مُقَدَّسینِ شَنِيدُم، ۱۶ دوامدار بلده شمو شکرگزاری کده شمو ره د دُعاهای خُو یاد مُونم، ۱۷ تا خُداى مولاى مو عيسی مَسِيحِ که آته پُر جلالِ آسته، روحِ حکمت و پي بُردو بلده شناس خُو دَز شمو بديه. ۱۸ دُعا مُونم که چيمای دِل شمو روشو شنه تا بدنيديد اُميدي که خُدا شمو ره بلده شى کوی کده چی آسته و اَرزِشِ ميراثِ پُر جلالِ اَزُو د مینکلِ مُقَدَّسینِ چی یه، ۱۹ و بزرگی بے اندازه قُدْرَتِ اَزُو بلده ازمو ایماندارا چی معنی دَره. اُمو قُدْرَتِ مُطابِقِ عَمَلِ قُوْتِ عَظِيمِ اَزُو آسته ۲۰ که اُو ره د و جُودِ

مسیح د کار بُرد وختیکه او ره از مُرده ها دُوباره زنده کد و د دِسْتِ راسْت خُو دَ عالمِ باله شند، ^{۲۱} باله تر از هر حُکومت و قُدرت و قُوت و پادشاهی و هر نامی که گرفته مُوشه، نَه تنها دَزی عالم، بلکه دَ عالمی که آمدنی آسته ام. ^{۲۲} خُدا تمام چیزا ره دَ زیر پایای مسیح اِشت و او ره دَ بله تمام چیزا قرار دده بلده جماعتِ ایماندارا سر جور کد ^{۲۳} که جماعتِ ایماندارا جِسْمِ اَزُو آسته، یعنی پُری اَزُو که پگِ چیزا ره از هر نگاه پُر مُونه.

زنده شدو قد مسیح

^۲ شُمو دَ خطاها و گُناهای خُو غرق شده مُرده بُودید، ^۲ دَ خطاها و گُناهای که شُمو یگ وخت دَزی زندگی کده از راه های ازی دُنیا و از حُکمرانِ قُدرتِ هوا پیروی مُوکدید، یعنی امزُو روح که فعلاً دَ وجودِ مردُمای نافرمان کار مُونه. ^۳ یگ زمان پگِ ازمو ام دَ مینکلِ ازوا دَ مُطابقِ هوس های جِسْمانی خُو زندگی کده از خواهشاتِ جِسْم و خواهشاتِ فِکرای خُو پیروی مُوکدی و طبیعتاً رقمِ دیگر و آلی مردُمای محکوم دَ غَضَب بُودی. ^۴ مگم خُدا که پُر از رحمت آسته، بخاطرِ مُحَبَّتِ بزرگ خُو که نِسَبَتِ دَزی مو دشت، ^۵ حتی دَ غَیْبَتیکه مو دَ خطاها خُو غرق شده مُرده بُودی، او مو ره قد مسیح زنده کد. پس دَ وسیله فیض-و-رحمت، شُمو نجات پیدا کدید. ^۶ اَره، خُدا مو ره قد اَزُو دُوباره زنده کد و دَ جای های آسمانی قد مسیح عیسی شند، ^۷ تا دَ عالم های آمدنی فیضِ بے اندازه پریمون خُو ره قد مهربانی دَ وسیله مسیح عیسی دَزی مو نشو بدیه. ^۸ چُون شُمو دَ وسیله فیض از طریقِ ایمان نجات پیدا کدید و ای کارِ از شُمو نیسته، بلکه بخشیش خُدا آسته، ^۹ نَه ام نتیجه اعمال شُمو، تا هیچ کس ننتنه دَ بله خُو افتخار کنه. ^{۱۰} چُون مو جور شده دِسْتِ خُدا آستی و دَ مسیح عیسی خَلق شُدے تا کارای نیک ره انجام بدی، کارای ره که خُدا پیش از پیش آماده کده تا دَ مُطابقِ ازوا رفتار کُنی.

یگجای بُودو قد مسیح

^{۱۱} پس شُمو کسای که غیر یهود دَ دُنیا آمدید دَ یاد خُو بیرید که یگ زمان دَ وسیله مردُمای که «ختنه شده» گفته مُوشد، «ناختنه» گفته مُوشدید، دَ حالیکه ختنه دَ جِسْمِ دَ وسیله دِسْتِ اِنسان انجام دده مُوشه. ^{۱۲} دَ یاد خُو بیرید که دَ او زمان شُمو از مسیح دُور، از تابعیتِ اِسْرَائیلِ محروم و قد عهد های وعده خُدا ناآشنا بُودید و بدون اُمید و بدون خُدا دَ ای دُنیا زندگی مُوکدید. ^{۱۳} مگم شُمو کسای که یگ زمان دُور بُودید، آلی دَ مسیح عیسی دَ وسیله خونِ مسیح نزدیک آورده شُدید. ^{۱۴} چُون او صلح-و-سلامتی مو آسته، امو که دُو جم ره یگ جور کد و دیوالِ جدایی ره که دَ مینکلِ یهود و غیر یهود بُود چپه کد و امو دُشمنی ره ^{۱۵} یعنی شریعت ره قد احکام و دستورای شی دَ وسیله

جسم خُو باطل کد تا امزی دُو د وجود خُو یگ انسان نو خَلق کده صلح-و آرامش ره برقرار کنه. ^{۱۶} و هر دُو جم ره د یگ جسم قد خُدا آشتی دلجی کنه، د وسیله صلیب خُو که دشمنی ره د بله ازو نابود کد. ^{۱۷} مسیح آمده خوشخبری صلح-و آرامش ره ام دز شمو که دور بودید و ام د کسای که نزدیک بود، اعلان کد ^{۱۸} تا از طریق ازو هر دُو جم مو د وسیله یگ روح د حضور آتیه آسمانی دسترسی داشته بشی. ^{۱۹} پس شمو غیر یهودیا دیگه بیگنه و ناشناس نیستید، بلکه از هموطن مقدسین و اعضای خانوار خُدا آستید، ^{۲۰} چون شمو د بله تادوی که رسول و پیغمبر ایشته آباد شدید که مسیح عیسی خود شی سنگ اصلی ازو آسته. ^{۲۱} د وسیله ازو تمام ساختمان قد یگدیگه خُو یگجای شده و رشد کده یگ خانه مقدس د وجود مولا جور موشه. ^{۲۲} دزو شمو ام قد یگدیگه خُو آباد شده جای بود-و باش خُدا جور موشید که خُدا د روح دز شی جای میگیره.

پولس، رسول بلده مردمای غیر یهود

^۳ د امزی دلیل ما پولس که بخاطر مسیح عیسی و بخاطر از شمو مردمای غیر یهود بندی آستم دعا مونم. ^۲ حتماً شمو د باره وظیفه اعلان کدون فیض خُدا که بخاطر از شمو دز مه دده شد شنیدید، ^۳ و ام ای که چطور ای راز د وسیله وحی بلده مه معلومدار شد، امو رقم که پیش ازی کوتاه نوشته کدم. ^۴ وختیکه شمو او ره بخانید، شمو میتنید فامیدگی مَره د باره راز مسیح پی ببرید. ^۵ ای راز د نسل های گذشته د بنی آدم معلومدار نشد، رقمی که آلی د رسول و انبیای مقدس خُدا د وسیله روح القدس معلومدار شده، ^۶ یعنی که مردمای غیر یهود قد یهودیا هم میراث و اعضای یگ جسم شده و د وعده خُدا د وسیله مسیح عیسی از طریق خوشخبری شریک شده. ^۷ ما د مطابق بخشش فیض خُدا که د وسیله عمل قدرت ازو دز مه دده شد، خدمتگار امزی خوشخبری شدیم.

^۸ اگرچه ما کمتر از کمترین پگ مقدسین آستم، ای فیض دز مه دده شد تا ارزش بے اندازه مسیح ره د مردمای غیر یهود اعلان کنم ^۹ و نقشه رازی ره که از زمانای قدیم د پیش خُدا تاشه نگاه شدد [بلده پگ] بر ملا کنم، د پیش خُدا که تمام چیزا ره خلق کد، ^{۱۰} تا د زمان حاضر، شکل های مختلف حکمت خُدا د حکمرانا و قدرت ها د جای های آسمانی از طریق جماعت ایماندارا ظاهر شنه. ^{۱۱} ای د مطابق ازمو قصد ازلی بود که خُدا او ره د وسیله مولای مو مسیح عیسی عملی کد ^{۱۲} که د وسیله ازو مو د جرات و اطمینان از طریق ایمان دزو د حضور خُدا دسترسی دری. ^{۱۳} پس خواهش مونم که بخاطر رنج های که ما بلده شمو میکشم دل سرد نشنید، چراکه اونا مایه افتخار شمو آسته.

دُعا بَلَدِه اِفِسِسِيا

^{۱۴} امزی خاطر ما زانو زده د پيش آته آسمانی که ^{۱۵} هر خانوار د آسمو و د زمی نام خو ره ازو میگیره ^{۱۶} دُعا مُونُم که او د مطابق بزرگی-و-جلال به اندازه خو دز شمو عطا کُنه تا د وسیله روح ازو قد قدرت د باطن خو قوی شنید ^{۱۷} تا مسیح د وسیله ایمان د دلهای شمو جای بگیره و شمو د محبت ریشه دَونده مستحکم شنید. ^{۱۸} دُعا مُونُم که قد تمام مُقدّسین توانایی ازی ره پیدا کُنید که بر و درازی و بلندی و غوجی محبت مسیح ره پی بُرید؛ ^{۱۹} و امو محبت ره که از علم انسان باله آسته بدنید تا از پری کامل خُدا پُر شنید تا خُدا که از پگ چیزا پُر آسته شمو ره ام پُر کُنه.

^{۲۰} و آلی بزرگی-و-جلال د خُدا که میتنه به اندازه کلو از هر چیزی که مو طلب کُنی یا د فکر شی بشی د وسیله قدرتی که د وجود مو عمل مونه، انجام بدیه؛ ^{۲۱} آره، د خُدا د بین جماعت ایماندارا و د مسیح عیسی نسل اندر نسل تا ابدالابد بزرگی-و-جلال باد. آمین.

اتفاق د جسم مسیح

^{۲۲} پس، ما که بخاطر مولا بندی آستُم د پيش شمو زاری مُونُم: شمو رقمی رفتار کُنید که لایق امزو دعوت بشه که شمو بلده ازو کوی شدید. ^۲ قد فروتنی کامل و ملایمت و قد صبر-و-حوصله یگدیگه خو ره د محبت تحمّل کُنید؛ ^۳ و سخت کوشش کُنید که اتحادی ره که د وسیله روح درید قد صلح-و-صفا نگاه کُنید: ^۴ یگ جسم و یگ روح آسته، امو رقم که شمو ام کوی شدید بلده یگ امید که د کوی شدون خو درید؛ ^۵ یگ مولا، یگ ایمان، یگ غسل تعمید؛ ^۶ و یگ خُدا که آته پگ و از پگ کده باله آسته و از طریق پگ و د وجود پگ کار مونه.

^۷ مگم بلده هر کدم ازمو مطابق د اندازه بخشش مسیح فیض بخشیده شد. ^۸ امزی خاطر د کلام خُدا مَوگیه:

“وختیکه او د عالم باله رفت

اسارت ره د اسپیری بُرد

و بخشش ها ره بلده آدما بخشید.

^۹ معنی ازی که «اُو باله رفت» چی آسته، بغير ازی که اوّل اُو دَ حصّه های تاهتر زمی ام رفتند؟ ^{۱۰} پس امو کسی که تاه رفت، اُو امو آسته که بالهتر از تمام آسمونا رفت تا تمام چیزا ره قد حُضور خُو پُر کُنه. ^{۱۱} اُو بعضی ها ره دَ عنوانِ رسول، بعضی ها ره دَ عنوانِ پیغمبر، بعضی ها ره دَ عنوانِ خوشخبری دهنده و بعضی ها ره دَ عنوانِ رهبر و معلم بخشید ^{۱۲} تا مقدّسین ره بلده کار خدمت آماده کُنه یعنی بلده آباد کدون جسمِ مسیح ^{۱۳} تا زمانی که پگ مو دَ اتفاقِ ایمان و شتختونِ باچه خُدا برسی و دَ ایمان خُو انسانِ بالغ شنی، دَ اندازه پُری قامتِ مسیح. ^{۱۴} پس مو دیگه باید مثل بچکیچای نبشی که دَ وسیله جلیه های آو ایسو-و-اوسو برده موشه و تَوسَطِ بادِ هر تعلیم پُف شده دَ وسیله حیلِه-و-مکرِ مردُم و دَ وسیله فریبِ نقشه های گمراه کُنده گمراه موشه، ^{۱۵} بلکه حقیقت ره دَ مُحَبّت بیان کُنی و از هر نگاه دَ امزو رُشد کُنی که سرِ جسم آسته، یعنی دَ مسیح. ^{۱۶} دَ وسیله ازو تمام جسمِ قد یگدیگه خُو یگجای شده و دَ وسیله هر مفصلی که بلده ازو آماده شده نگاه موشه. پس وختیکه هر عضو دَ دُرستی کار کُنه، جسم ره رُشد میدیه تا جسم خود ره از طریقِ مُحَبّت آباد کُنه.

زندگی کدو رقمِ بچکیچای نور

^{۱۷} ما ای ره موگم و دَ نامِ مولا تاکیدِ موئم که شمو دیگه نباید رقمی زندگی کُنی که مردمای خُداناشناس دَ مطابقِ فِکرا-و-خیالاتِ باطلِ خُو زندگی مونه. ^{۱۸} چون فِکرای ازوا تیره-و-تریک شده و اونا بخاطرِ جهالتی که دزوا آسته و بخاطرِ سنگدلی خُو، از زندگی که خُدا موبخشه محروم شده. ^{۱۹} اونا احساس خُو ره از دست دده و خود ره تسلیم فسق-و-فساد کده تا هر رقم ناپاکی ره حریصانه انجام بدیه.

^{۲۰} لیکن شمو امی رقم چیزا ره دَ باره مسیح یاد نگرِفتید، ^{۲۱} اگه واقعاً دَ باره مسیح شنیدید و دَ راهِ ازو مطابقِ حقیقتی که دَ عیسی وجودِ دَره تعلیم دده شدید. ^{۲۲} شمو تعلیم دده شدید تا طریقّه زندگی سابقِ خُو، یعنی امو طبیعتِ کُنه ره که دَ وسیله خاهشاتِ نفسانی فریبده فاسد شُدد، از خود دُور کُنی ^{۲۳} و دَ روح و فِکر خُو نو شنید ^{۲۴} و طبیعتِ نو ره بپوشید که دَ عدالت و قُدوسیتِ حقیقی مطابقِ اِرادِه خُدا خَلق شُد.

^{۲۵} پس دروغ ره ایله کده هر کس باید قد همسایه خُو توره راست ره بگیه، چراکه پگ مو اعضای یگدیگه خُو آستی. ^{۲۶} وختیکه قار موشید، گناه نکُنی؛ نیلید که آفتو بشینه و قار شمو باقی بَمنه. ^{۲۷} دَ ابلیس وخت ندید. ^{۲۸} دز باید دیگه دُزی نکُنه، بلکه قد دستای خُو زحمت کشیده کار نیک کُنه تا بتنه بلده نفرای مُحْتَاج یگو چیز بدیه. ^{۲۹} هیچ توره بد از دان شمو بر نَشنه، بلکه تنها چیزای فایدهمند بلده آباد کدونِ دیگر و دَ مطابقِ ضرورتِ ازوا کُفته شنه تا بلده شتونده ها فیض برسنه. ^{۳۰} روحِ اَلْقُدُسِ خُدا ره که شمو دَ وسیله ازو بلده روز رستگاری مَهر شدید،

غمگي نكُنيد. ^{۳۱} هر رقم اوقات تلخي، قار، غَضَب، غالمغال، بدگويي و كينه ره از خود دُور كُنيد. ^{۳۲} و نسبت د يگديگه خُو مهربان و دلسوز بشيد و يگديگه خُو ره ببخشيد، امو رقم كه خُدا ام شمو ره د وسيله مسيح بخشیده.

زندگی کدو د نور

۵ پس رقم بچکيچای دوست دشتنی از خُدا سرمشق بگيريد ^۲ و د مُحَبَّت زندگي كُنيد، امو رقم كه مسيح مو ره مُحَبَّت كد و جان خُو ره بخاطر ازمو بَحِيث هديه و قرباني د عنوان خوشبُوي مَورِد پَسَنِد خُدا تَقَدِيم كد.

^۳ زنا و هر رقم ناپاكي يا حرص بايد د مينكل شمو حتى ذكر ام نَشْنه، چراكه امي چيزا بلده مُقَدَسِين مُناسِب نييه. ^۴ گفتار زشت، ايله گويي و مزاق پُوچ از هيچ نگاه مُناسِب نييه، بلكه د جاي ازي چيزا سُكْرگُزاري كُنيد. ^۵ چُون اِي ره بَدَنيد كه هيچ زناكار، شخص ناپاك و حريص -- كه امي رقم آدما بُت پَرستنا آسته -- د ميراث پادشاهي مسيح و خُدا شريك نيسته. ^۶ د هيچ كس اجازه نديد كه شمو ره قد توراي پُوچ و باطل بازي بديه، چُون بخاطر امزي چيزا آسته كه غَضَب خُدا د بله كساي كه ناطاعتي موكنه نازل موشه. ^۷ پس قد ازوا همدست نبشيد؛ ^۸ چُون شمو يگ زمان پُر از تربكي بُويد، مگم آلي د وسيله مولا پُر از نور آستيد. امزي خاطر رقم بچکيچای نور زندگي كُنيد، ^۹ چُون ثمر نور د هر رقم نيكي، عدالت و راستي ديده موشه. ^{۱۰} كوشش كده پي بريد كه چيزخيل باعث خوشي مولا موشه. ^{۱۱} د كاراي بے ثمر تربكي شريك نَشْنيد، بلكه اونا ره بے پرده كُنيد، ^{۱۲} چُون كاراي ره كه اونا تاشكي انجام ميديه، حتى گُفتون شي ام شرم آور آسته. ^{۱۳} ليكن هر چيزي كه د وسيله نور بے پرده شنه، اُو بَرَمَلا موشه. ^{۱۴} چُون نور آسته كه هر چيز ره بَرَمَلا مونه. امزي خاطر موكيه:

“اِي تُو كه د خاوي، بيدار شو

و از مينكل مرده ها باله شو

و نور مسيح د بله تُو روشني مونه.”

^{۱۵} پس فكر خُو ره بگيريد كه چي رقم بايد زندگي كُنيد، نه رقم مردُمای نادو، بلكه رقم مردُمای دانا. ^{۱۶} از وخت خُوب استفاده كُنيد، چراكه امي روزها، روزهاي بد آسته. ^{۱۷} امزي خاطر لَوْذَه نَبشيد، بلكه بُفَامِيد كه اراده مولا چي آسته. ^{۱۸} خود ره قد شراب نَشه نكُنيد، چراكه از شراب فسق-و-فساد د وجود مييه، بلكه از روح اَلْقُدَس پُر شُنيد.

^{۱۹} قد یگدیگه خو از زبور و حمد-و-ثنا و سرود های روحانی توره بگید و د دل های خو بلده مولا سرود جور کده بخانید. ^{۲۰} بلده تمام چیزا همیشه از خدا یعنی آته آسمانی د نام مولای مو عیسی مسیح شکرگزاری کنید.

رابطه خاتو و شوی

^{۲۱} بخاطر احترام د مسیح، تابع یگدیگه خو بشید. ^{۲۲} ای خاتونو، تابع شویون خو بشید امو رقم که تابع مولا آستید، ^{۲۳} چراکه شوی سر خاتو آسته، امو رقم که مسیح سر جماعت ایماندارا آسته، سر جسمی که او نجات دهنده شی آسته. ^{۲۴} پس امو رقم که جماعت ایماندارا تابع مسیح آسته، خاتونو ام باید د هر کار تابع شویون خو بشه.

^{۲۵} ای شوی ها، خاتونوی خو ره محبت کنید، امو رقم که مسیح جماعت ایماندارا ره محبت کد و جان خو ره بلده شی دد ^{۲۶} تا او ره قد آو ششته د وسیله کلام، پاک و مقدس کنه ^{۲۷} و تا جماعت ایماندارا ره قد شکوه-و-جلال و بدون لکه و چین و چیزای مثل امزیا د حضور خو تقدیم کنه تا مقدس و بے عیب بشه. ^{۲۸} د عین رقم، شوی ها باید خاتونوی خو ره رقم جان خو آلی محبت کنه، چون هر کسی که خاتون خو ره محبت کنه، او خود خو ره محبت مونه. ^{۲۹} چون هیچ کس هرگز از جسم خو نفرت ندره، بلکه دزو خوراک میدیه و او ره کاله موکنه، امو رقم که مسیح جماعت ایماندارا ره کاله موکنه، ^{۳۰} چراکه مو اعضای جسم ازو آستی. ^{۳۱} «امزی خاطر مرد آته و آبه خو ره ایله کده قد خاتون خو یگجای موشه و هر دوی شی یگ جسم موشه.» ^{۳۲} ای یگ راز بزرگ آسته، لیکن ما د باره مسیح و جماعت ایماندارا توره موگم. ^{۳۳} خلاصه هر کدم از شمو باید خاتون خو ره رقم جان خو آلی محبت کنید و خاتو باید شوی خو ره احترام کنه.

رابطه آته-و-آبه قد بچکیچا

^۱ **۶** ای بچکیچا، از آته و آبه خو د احترام مولا اطاعت کنید، چراکه ای کار درست آسته. ^۲ «آته و آبه خو ره احترام گو،» ای اولین حکم آسته که قد وعده قتی یه: ^۳ «تا د خیر-و-خوبی تو تمام شنه و د بیه زمی عمر دراز دشته بشی.» ^۴ ای آته گو، بچکیچای خو ره سر قار نکنید، بلکه اونا ره د مطابق تربیه و هدایت مولا کته کنید.

د باره غلاما و بادارا

^۵ ای غلاما، از بادارای انسانی خو قد ترس و لرز و قد دل صاف اطاعت کنید، امو رقم که از مسیح اطاعت مونید،

نه تنها وختیکه زیر نظر آستید، رقم کسای که رضایت انسان ره طلب مونه، بلکه رقم غلامای مسیح که خاست-و-
 اراده خدا ره از دل-و-جان د جای میره.^۷ اونا ره قد نیت پاک خدمت کُنید، رقمی که بگی د مولا خدمت مونیید نه د
 انسان،^۸ چون شمو میدنید که هر کس هر عمل نیک ره انجام بدیه، مولا اجر شی ره میدیه، چی غلام بشه، چی
 آزاد.^۹ ای بادارا، شمو ام قد غلامای خوامی رقم رفتار کُنید و اونا ره نترسنید، چون شمو میدنید که ام شمو و ام
 غلامای شمو یگ بادار درید که د عالم باله آسته و او از کس طرفداری نموکنه.

سلاح بلده جنگ روحانی

^{۱۰} د آخر، ای عزیزا، د وسیله مولا و د وسیله توانایی قدرت ازو قوی بشید. ^{۱۱} سلاح کامل خدا ره بپوشید تا بتنید د
 برابر مکرها-و-چالای ابلیس مقاومت کُنید،^{۱۲} چون کشمکش ازمو قد خون و جسم نییه، بلکه قد حکمرانا، قدرت
 ها و اختیاردارای امزی تریکی و قد لشکرهای ارواح شیطانی د عالم باله آسته.^{۱۳} امزی خاطر سلاح کامل خدا ره
 بپوشید تا بتنید دمزو روز بد مقاومت کُنید و تمام چیزا ره انجام دده اُستوار بُمینید.^{۱۴} پس اُستوار منده کمر بند
 حقیقت ره د کمر خو بسته کُنید و زره عدالت ره د جان خو کُنید^{۱۵} و چیلی آمادگی ره بلده اعلان کدون خوشخبری
 صلح-و-سلامتی د پای خو کُنید.^{۱۶} علاوه ازیا، سپر ایمان ره بگیریید تا بتنید د وسیله ازو تمام تیرهای آتشی شیطو
 ره گل کُنید.^{۱۷} کوله آینی نجات ره د سر خو ببید و شمشیر روح ره که کلام خدا آسته، د دست خو بگیریید.^{۱۸} هر
 غیت د هر دعا و درخواست خو قد روح دعا کُنید و بلده امزی کار بیدار بشید و دوامدار بلده تمام مُقدّسین دعا
 کُنید.^{۱۹} بلده ازمه ام دعا کُنید که قدرت کلام دز مه دده شنه تا ما دان خو ره واز کده د دلیری راز خوشخبری ره
 بر ملا کُنم^{۲۰} که سفیر شی اُستم، هر چند که د زنجیرم. دعا کُنید که د باره شی د دلیری توره بگم، یعنی امو رقم که
 مکلف اُستم توره بگیم.

سلام های آخری

^{۲۱} بلده ازی که شمو ام بدنید که ما چطور اُستم و چیز کار مونم، تیخیکاس که برار عزیز و خدمتگار وفادار د احترام
 مولا آسته، شمو ره از تمام چیزا باخبر مونه.^{۲۲} ما او ره بلده امزی مقصد د پیش شمو ریی مونم که شمو از احوال
 مو باخبر شنید و تا او شمو ره دل-جمی بدیه.

^{۲۳} سلامتی و محبت قد ایمان از طرف آته مو خدا و مولای مو عیسی مسیح بلده برارو نصیب شنه.^{۲۴} فیض خدا
 نصیب تمام کسای شنه که بلده مولای مو عیسی مسیح محبت به پایان د ره. آمین.

سوال دارید؟ +1 807.700.6090
آزرگی © afghanbibles.org